

Evening Dogri News Bulletin, 18 July 2024

इवनिंग डोगरी न्यूज़ बुलेटिन
समे-18:15 Hrs

Headlines

- 1 लेफ्टिनेंट गवर्नर मनोज सिन्हा होरें आखेआ ऐ जे चौथी औद्योगिक क्रांति च तब्दीलिएं दी रफ्तार ते पैमाने, उद्योगें ते शिक्षा इदारे बश्कार साथ-सैहयोग गी तगड़ा बनाने दा आह्वान करदे ना।
- 2 एल.जी मनोज सिन्हा होरें दर्द जनजाति दी संस्कृति, रीति-रिवाजें, भाषा ते समाजी ढांचें गी दर्शाने आली डाक्टर सुशील रसूल मीर हुंदी कताब **Cultural Encyclopaedia of Dard Tribe** दा अज्ज विमोचन कीता।
- 3 उत्तरी कश्मीर दे कुपवाड़ा जिले च कब्जा रेखा कश दऊं आतंकवादिऐं गी मारी-मकांदे होई सुरक्षाबलें घुसपैठ दी कोशश गी नाकाम बनाई दित्ता ऐ।
- 4 गृह मंत्रालय नै आखेआ ऐ जे सरकारै नशे दी तस्करी गी बिंद बी बर्दाश्त करने दी नीति अपनाई दी ऐ तां जे नशीले पदार्थें दी कवैतु कन्नै निब्बड़ेया जाई सकै।

<><><><><><>

LG-College

लेफ्टिनेंट गवर्नर मनोज सिन्हा होरें अज्ज रणबीरगढ़ श्रीनगर च कश्मीर कॉलेज ऑफ इंजीनियरिंग एंड टेक्नोलॉजी दा उद्घाटन कीता। अपने भाषण च एल.जी होरें शिक्षा दे खेत्तर च तकनीकी उत्कृष्टता, नमिएं काहड़ें, भविक्ख लेई तैयार कुशल कार्यबल लेई कालेज दे चेरयमैन राजा ऐजाज अली ते उंदी टीम गी मुबारकबाद दित्ती। औद्योगिकी खेत्तर च तेजिआ कन्नै आवै करदे बदलावें बारे एल.जी होरें आखेआ जे चौथी औद्योगिकी क्रांति च बदलाव दी रफ्तार ते पैमाना, उद्योगें ते शैक्षणिक इदारे दे साथ-सहयोग गी होर तगड़ा बनाने दा आह्वान करदा ऐ। उनें इंजीनियरिंग कालजें च नमिएं काहड़ें आली संस्कृति गी बढ़ावा देने ते पाठ्यक्रम गी उद्योगें दिऐं जरूरतें मुजब बनाने दी जरूरतै पर जोर पाया। उनें आखेआ जे उद्योगें दा भविक्ख डिग्रियां नेई सगुआं हुनर तैय करोग। सिन्हा होरें आखेआ जे भविक्ख दे कार्यबल गी आधुनिक जरूरतें मताबक लोडचदे हुनरें कन्नै लैस होना चाहिदा तां जे भविक्ख दरान टिके रौहने आले कार्यकाल कायम कीते जाई सकन। एल.जी होरें प्रधानमंत्री नरेंद्र मोदी हुंदे मार्गदर्शन तैहत शिक्षा दे खेत्तर च आंदे गेदे सुधारें पर लो पाई जिंदा मकसद जम्मू-कश्मीर च नमें उद्योग-धंधें, नमिएं काहड़ें ते उद्यम कारखानादारी गी बढ़ावा देना ऐ।

<><><><><><>

LG-Book

लेफ्टिनेंट गवर्नर मनोज सिन्हा होरें डॉक्टर सुशील रसूल मीर हुंदे आस्सेया लिखी गेदी कताब **Cultural Encyclopaedia of Dard Tribe** दा अज्ज राजभवन श्रीनगर च विमोचन कीता। अपने संबोधन च LG होरें Dard Tribe दी संस्कृति, रीति-रिवाजें, भाषा ते समाजी ताने-बाने गी अपनी कताब दे राहें दर्शाने लेई डाक्टर मीर होरें गी मुबारकबाद दित्ती। राष्ट्र निर्माण च इस जनजातीय समुदाय दे महत्वपूर्ण जोगदान पर लो पांदे होई एल.जी होरें इस जनजातीय समुदाय दे समृद्ध रीति-रिवाजें, संस्कृति ते भाषाई संपत्ति दी सांभ-संभाल ते इसी बढ़ावा देने लेई सब्बनें सरबंधत धड़ें दे सांझे जत्तें पर बल दित्ता। श्री सिन्हा होरें कश्मीर राईटर्स एसोसिएशन ते फौज दे सांझे जत्त The North Kashmir Gazette दा दुआ संस्करण बी जारी कीता। फौज दी वज्र डिविजन दे जी.ओ.सी मेजर जनरल गिरीश कालिया, डाक्टर सुशील रसूल मीर, कश्मीर राईटर्स एसोसिएशन दे प्रधान फिदा फिरदौस ते होर बी केई लोक इस मौके पर उत्थे मजूद हे।

<><><><><><>

FS-Bhutan

विदेश सचिव विक्रम मिसरी कल्लै थमां भूटान दे दऊं दिनें दे आधिकारिक दौरे पर रौडगन। विदेश सचिव दा औहदा साम्भने दे मगरा एह इंदा पैहला दौरा ऐ। अपने इस दौरे दौरान विक्रम मिसरी भूटान दे राजा कन्नै बी मलाटी करडन। विदेश सचिव भूटान दे प्रधानमंत्री, विदेश मामलें ते विदेश बपार मंत्री, अपने भूटानी समकक्ष ते भूटान दी सरकार दे होरनें वरिष्ठ अधिकारियें कन्नै बी मलाटी करडन। दवै सचिव भारत-भूटान विकास सहयोग गल्लबात दी बी अध्यक्षता करडन। विदेश मंत्रालय नै आखेआ ऐ जे एह जात्तरा भारत ते भूटान बश्कार उच्चे सतह दी लेन-देन दी परम्परा गी ध्याना च रखदे होई होआ' रदी ऐ ते भारत सरकार दी अपने गवांडिएं गी तरजीह देने आहली नीति गी दिती जाने आहली पैहली प्राथमिकता गी दर्शादी ऐ।

<><><><><><>

MOS-MEA Oman

विदेश राज्य मंत्री कीर्ति वर्धन सिंह होरें पलटोए दे ज्हाज बारै पूरी जानकारी हासल करने आस्तै ओमान दे भारती राजदूत अमित नारंग हुंदे कन्नै गल्लबात कीती। इक सोशल मीडिया पोस्ट च राज्यमंत्री होरें आखेआ ऐ जे आई.एन.एस तेग आस्सेआ बचाए गेदे अट्टे भारतीयें गी सुरक्षित थाहै पर पजाई दिता गेआ ते उंदी दिक्खभाल कीती जा'रदी ऐ। उनें आखेआ ऐ जे इक भारती दा शव बी बरामद करी लैता ऐ। उनें इब्बी दस्सेया ऐ जे स्थिति पर पूरा-पूरा ध्यान दिता जा'रदा ऐ ते सरकार इस सरबंधै च हर मुमकन कोशश करा'रदी ऐ। राज्यमंत्री कीर्ति वर्धन सिंह होरें भारत ते ओमान दे सब्भनें अधिकारियें दा धन्नवाद कीता जेहडे इस प्रक्रिया च उत्थे कम्म करा'रदे न। उनें इस घटना च जान मुहाने आहलें दे परोआरें कन्नै अपनी संवेदना बी प्रगट कीतियां न।

<><><><><><>

MEA-Advisory-Bangladesh

विदेश मंत्रालय नै भारतीय समुदाय दे सदस्यें ते बांगलादेश च रौहने आहले विद्यार्थियें गी आखेआ ऐ जे ओह यात्रा थमां परहेज करन ते अपने रौहने आहले ठकानें थमां बाहर अपनी आओजाई गी घट्ट शा घट्ट करन। बंगलादेश च चला'रदी स्थिति गी दिखदे होई ढाका च भारती हाई कमिशन नै लोकें गी आखेआ ऐ जे जेकर उनें'गी कुसै बी चाल्ली दी मदाद दी लोड पौंदी ऐ ते ओह 24एं घैंटें आहले हाई कमिशन ते असिस्टेंट हाई कमिशनें दे नंबर पर तुरत फौन करन। ढाका दे हाई कमिशन दा एमरजेंसी नंबर ऐ। 8801937400591

<><><><><><>

Coal-Mines

कोयला मंत्रालय नै दस्सेया ऐ जे दुनिया दिएं 5 सब्भनें शा बड्डी कोयला खदानें चा दऊं इस बेल्ले भारत च न। छत्तीसगढ़ च स्थित गेवरा ते कुसमुंडा खदानां दुनिया दी सब्भनें शा बड्डी कोयला खदानें चा दुए ते चौथे नम्बरै पर न। एह सूची World Atlas.com आस्सेआ जारी कीती गेई ही। गेवरा ते कुसमुंडा खदानां किट्टे रलियै हर बरे 10 करोड़ टन शा मते कोयले दा उत्पादन करदिआं न जेहडा भारत दे कुल कोयला उत्पाद दा तकरीबन 10 प्रतिशत ऐ। गेवरा ओपनकास्ट खदान दा कम्म 1981 च शुरू होआ हा जेदी सलाना उत्पादन समर्थ 7 करोड़ टन ऐ ते इन्नै बरे 2023-24 च 5 करोड़ 90 लक्ख टन दा उत्पादन कीता ऐ। एहदे च अगले दहाके लेई मुख दिएं उर्जा जरूरतें गी पूरा करने गित्तै कोयले दा सुदा भंडार मजूद ऐ। तोआई कुसमुंडा खदान नै बरे 2023-24 च 5 करोड़ टन शा मते कोयले दा उत्पादन कीता ऐ।

<><><><><><>

Shah-Narcotics

गृहमंत्री अमित शाह होर नमीं दिल्ली च नार्को तालमेल केंद्र दी उच्च सतह दी बैठक दी अध्यक्षता करा'रदे ना। बैठक दा मकसद केंद्र ते राज्य सरकारें दी एजेंसियों दे सहयोग कन्नै नशीले पदार्थें दी तस्करी ते इंदे गलत इस्तेमाल पर काबू करना ऐ। गृह मंत्रालय नै दस्सेया ऐ जे सरकार नै नशीले पदार्थें दी तस्करी गी काबू करने आस्तै बिंद बी नेई बर्दाश्त करने आहली नीति अपनाई ऐ। बैठक च आखेआ गेआ जे सरकार दा लक्ष्य त्रै सूत्री रणनीति दे राहें 2047 बरे तगर देश गी नशीले पदार्थें थमां मुक्त बनाना ऐ। एहदे आस्तै जेहिडियां त्रै रणनीतियां तैयार कीतियां न ओहू न संस्थागत ढांचे गी तगड़ा बनाना, नशीले पदार्थें पर काबू पाने आस्तै सब्भनें एजेंसियों कन्नै तालमेल बदाना ते बड्डे सतह पर लोके च जागरूकता अभियान शुरू करना।

<><><><><><>

Encounter-Kupwara

उत्तरी कश्मीर दे कुपवाड़ा जिले च सुरक्षाबलें अज्ज कब्जा रेखा पर घुसपैठ दी इक कोशिश गी नाकाम करी दित्ता ऐ ते दऊं आतंकवादियें गी मारी मकाया ऐ। अधिकारियें दी जानकारी मताबक दक्खनी कश्मीर दे केरन सेक्टर च घुसपैठ दी कोशिश गी नाकाम कीता गेआ ते दौनें तरफा दी गोलीबारी च द'ऊं आतंकवादियें गी मारी मकाया गेआ। अभियान अजें जारी ऐ ते होर ब्यौरे गी अजें बलगेआ जा'रदा ऐ।

<><><><><><>

Encounter-Doda

जम्मू-कश्मीर दे डोडा जिले दे जडुन लाहके च अज्ज बड्डुलै सुरक्षाबलें पर कीते गेदे हमले दे मगरां आतंकवादियें खलाफ जारी अभियान गी होर तेज करी दित्ता गेआ ते इस लाहके च होर मते सुरक्षाकर्मी ते थेआर भेजे गे'न। पुलस दे रामबन-डाडा रेंज दे डी.आई.जी श्रीधर पाटिल होरें अज्ज डोडा दे काश्तीगढ दे हमले आहली थाहरा दा दौरा लाया। उनें आखेआ।

<><><><><><>

SC-NEET

सुप्रीम कोर्ट नै अज्ज नीट अंडर ग्रैजुएट 2024 म्तेहान दे विवाद कन्नै जुडी दिएं याचिकाएं दी सुनवाई शुरू करी दित्ती ऐ। एहदे शां पैहले जंदी 11 जुलाई गी सर्वोच्च अदालतै केंद्र ते एन.टी.ए दी तरफां किश धडें गी जवाब नेई दित्ते जाने गी दिखदे होई सुनवाई स्थगित करी दित्ती ही। मुख् न्याधीश डी.वाई चंद्रचूड, न्यामूर्ति जे.बी पारदीवाला ते न्यायमूर्ति मनोज मिश्रा हुंदी खंडपीठ 40एं शा मती याचिकाएं पर सुनवाई करोग। उंदे च बक्ख-बक्ख हाई कोर्ट च बकाया पेदे मामलें गी सुप्रीम कोर्ट च भेजने दे सरबंधें च एन.टी.ए. दी तरफां दायर कीती गेदियां याचिकां बी शामिल ना।

<><><><><><>

CBI-AIIMS Detained

सी.बी.आई नै नीट-यूजी प्रवेश परीक्षा म्तेहान लीक मामले च अज्ज पटना दे एम्स दे चऊं विद्यार्थियें गी हिरासत च लैता ऐ। एम्स पटना दे कारजकारी निदेशक डॉक्टर जी.के पाल नै आखेआ ऐ जे जिनें विद्यार्थियें गी हिरासत च लैता गेआ ऐ, ओहू एम.बी.बी.एस कोर्स दे दुए ते त्रीये बरे च पढदे ना। उनें आखेआ जे सी.बी.आई नै इनें विद्यार्थियें दे लैपटॉप बी जब्त करी लैते न ते उंदे कमरे बी सील करी दित्ते गे'न। इनें विद्यार्थियें थमां सी.बी.आई पुच्छ-गिच्छ करा'रदी ऐ।

<><><><><><>

Jasrotia-Election

बीजेपी दे वरिष्ठ नेता ते साबका मंत्री राजीव जसरोटिया होरें आखेआ ऐ जे लोकतंत्र दे राहें इक आम माहनू बी बड़ी सखल्लें सरकार तगर पुज्ज बनाइयै अपने मसलें गी हल करोआई सकदा ऐ। उनें आखेआ जे जम्मू-कश्मीर च असैम्बली दे चुनां लेई केंद्र सरकार दा रौं इकदम स्पष्ट ऐ ते माहौल साजगार होने पर इत्थे भारतीय चुनांस आयोग आस्सेआ चुनां करोआई दित्ते जांगन। साबका मंत्री होरें लोकें गी अपील कीती ऐ जे ओह 20 जुलाई थमां प्रधानमंत्री हुंदे आस्सेआ रम्भे गेदे अभियान 'एक पेड़ मां' के नाम गी किट्टे रलियै अगगे बधान। स्हाड़े संवादाता प्रदीप शर्मा कन्नै गल्ल करदे होई राजीव जसरोटिया होरें आखेआ।

<><><><><><>

Khelo-India Kirti

युवा मामले ते खेडू मंत्री डॉक्टर मनसुख मांडविया होर सरकार दी खोलो इंडिया राइजिंग टैलेंट आइडेंटिफिकेशन कीर्ति पैहल दे दुए चरण दा कल नमीं दिल्ली च उद्घाटन करडन। कीर्ति दा पैहला चरण इस्सै बरे 12 मार्च गी चंडीगढ़ च शुरू कीता गेआ हा। इस पैहल दा मकसद सभनें राज्यें गी शामिल करियै 2024-25 तगर 20 लख खेडू प्रतिभाएं दा मूल्यांकन करना ऐ। एह पैहल प्रधानमंत्री नरेंद्र मोदी हुंदी बड़ी पैमाने पर भागीदारी दे माध्यम कन्नै देशै दे सभनें जागतें तगर खेडू गी पजाने दे मकसद कन्नै शुरू कीती गेई ऐ। कीर्ति दे पैहले चरण च 70 केंद्रें पर 62 जहार 683 पंजीकरण होए हे।

<><><><><><>